

## 經文：II Corinthians 1:18-22

咱 tī 家庭查經班 bat 討論過山上寶訓有關咒 chōa ê 教訓，耶穌吩咐伊 ê 學生講：「一概莫得 chiù-chōa …lín ê 話 tiòh 講，是，就是；m̄是，就 m̄是」(太 5:34、37) 咒 chōa 就是用上帝 ê 名來保證家己所講之真實性，譬如講：舊約聖經常描述上帝用伊 ê 誓言作實現應允 ê 保證 (創 22:16；50:24；申 6:18，28 等)。Tī 宗教改革時期，真 chē 重浸派 ê 信徒拒絕 tī 法庭或任何所在起誓。In 相信人 ê 誠實應該前後一致，根本不需要用咒 chiā 來支持，一個簡單 ê 是或毋是就夠額。M-k oh 耶穌講 chit 句話並 m̄是指法律上 ê 咒 chōa 講 ê，卻是指有 kóa 人 ài 講大聲話，thèh 家己 ê 生命 kap 頭作擔保，或是叫天地來見證伊講 ê 話是對 ê。現此時 ê 法律，普遍 bô 禁止咒 chōa 或是宣誓，總是要求人對伊所起 ê 誓忠實，合佇聖經 ê 教示。保羅論咒誓，除了今 á 日 ê 經文之外，佇羅 1：9、加 1：20、林後 1：23、II：10& 31、腓 1：8、帖前 2：5 & 10 mā lóng 有提起。信原來 ê 意思是真實、可靠、穩當。信是上帝 ê 一種德性，伊是信實 ê，伊守伊所立 ê 「約」，用慈愛對待 kap 伊立約 ê 百姓。啓應文詩篇 100：5 講：「上主至善，伊 ê 慈愛永恆；伊 ê 信實萬代長存。」chit 種比喻 ê 講法，就是說明上帝是堅固 ê，是咱 ê thang 倚靠 ê 力量。全款，人 mà 要有信，人 ê 性變化無常，又卡 ài 誠實。

保羅 tī 第二 pái 宣教旅程中建立哥林多教會了後，一直 kap in 保持密切 ê 關係。總是哥林多人不定性，受 tiòh 外來者 ê 煽動，質疑保羅 ê 屬靈能力 kap 權柄，甚至懷疑保羅處理金錢 ê 正直。哥林多人用保羅改變行程來控訴伊忽是忽非，用其行，斷其言，指出伊所傳 ê 道 bē-tàng 信。對保羅來講，伊傳 ê 道絕對 bē-sái 互人質疑，對 chia 伊指著上帝 ê 信實來咒 chōa，上帝是怎樣 thang 信，伊所傳 ê 道 mà 全款的確定。保羅講：無論上帝 ê 應允是 jōa-nih-á 大，tī 基督裡 lóng 是 thang 兌現 ê，上帝一切 ê 應允 lóng 成做「是」(v.20)；所以咱 ài 講阿們來回應，hō 上帝得 tiòh 榮光。用洗禮來表明咱受抹油 tī 基督裡，kap 上帝之間有生命 ê 約。用聖餐表明 kap 耶穌基督永遠結連作伙，kap 上帝 ê 疼永不分離。上帝是信實 ê，伊信守 kap 百姓 ê 約，因為這 ê 約是用耶穌基督 ê 生命建立，是 bô 價 ê。咱 ài 用嚴肅 ê 態度來看待。保羅 tī 今 á 日 ê 經文中用四個動詞向咱保證伊所傳 ê 道是信實 ê：

**堅固：**保羅講：「凡若稱呼主 ê 名 ê tiòh 離開不義。」(提後 2：19)，當咱領受聖神 ê 恩賜了後，tō 是完全屬基督 ê。上帝將咱 khng tī 基督裡，伊所遭遇 ê，咱 mà 遭遇。伊所經歷 ê，咱 tī 伊裡面 mà 經歷著。『咱 ê 舊人，kap 伊同釘十字架，hō 罪身滅絕，叫咱無 koh 作罪 ê 奴僕。』(羅 6:6) 舊我 kap 基督同釘十字架，tùi-án-ni 咱 tī 基督裡，自然得堅固，願意獻上生命。示每拿 ê 主教波旅甲(Polycarp)互押去刑場 ê 時，羅馬巡撫爲 tiòh beh 救伊，hō 伊尙尾擺 ê 機會，只要伊 tī 眾人面前否認基督，就放伊，但是波旅甲講：「八十六年來我一直侍奉我 ê 主，伊從來 m̄-bat 虧待我，我怎樣 thang 互 hit 位拯救我 ê 君王見笑 neh?」巡撫受氣講：「án-ni 我就 bē-tàng 不將你 tàn hō 野獸食。」波旅甲回答講：「放你 ê 野獸來 ah!」巡撫講：「既然你不怕，我就 kā 你燒。」波旅甲平靜回講：「你想 beh 用火嚇驚我，那 ê 火尙久燒一點鐘 nā-tiān，lín 卻永遠 tiòh hò 地獄 ê 火燒。」巡撫大聲對群眾喊講：「波

旅甲講伊是基督徒！」tùi án-ne 暴民起來，將伊活活燒死。

抹油：咱知影彌賽亞 ê 原意就是受膏 ê，tī 舊約中 kan-ta<sup>n</sup> 士師、國王、祭司 kap 先知 chiah ē-tàng 受抹油。基督怎樣受抹油，咱 mà 怎樣受抹油，kap 伊同得聖神 ê 恩賜。現此時 ê 靈恩派努力佇追求聖神充滿，無限度擴大屬靈 ê 經驗，是相當危險 ê。保羅所強調 ê 是結聖神 ê 果子，信仰必須落實 tī 生活，chiah 是真 ê 信仰。伊保證咱受召一定有聖神同工，是 beh 分別出來作基督 ê 見證者 kap 天國 ê 使者，來宣揚天國 ê 福音。

**印：**指古代文件用印封 tōa，烙上印記，有伊所有 ê 意思，基督是咱 ê 主，咱是屬 tī 伊 ê。基督徒是咱 ê 身分標記（啓 7:3-8；弗 1:13 & 4:30），就是互耶穌特別揀選 ê，所以咱 ài 有耶穌 ê 樣式 tī 世上做光、做鹽。尤其是台灣 ê 社會對基督徒 ê 要求真高，咱也 tiòh 立志做基督 ê 精兵，成做見證主 ê 器具。以前阮老父 tī 新屋教會牧會 ê 時 chūn，有一年 ê 暑假，一位成大外文系 ê 女學生來做禮拜。禮拜了後，家父問伊 ê 背景，原來伊 ê 室友是基督徒，伊發現 chit 位同學真無全款，問伊爲啥物，室友表明家己是基督徒，伊深受感動，認爲既然基督徒 chiah-ni 好，伊也 tiòh 成做基督徒，tùi án-ne 利用暑假到阮鄉裏唯一 ê 教會來聚會。所以咱 nà beh 引 chhōa 人歸主，見證就是咱做基督徒 ê 標記。

**擔保：**賞賜聖神 tī 咱心內作爲擔保。擔保是當時 ê 商業用語，等於今 á 日 ê 頭期款或是訂金，若 án-ne 講聖神 ê 恩賜就是咱得救 ê 頭期款，是伊 kap 咱立約 ê 保證，保證咱到尾 ê 救贖是一定會兌現 ê。

保羅 tī chia 指出上帝 ê 道 kap 應允嘅是「是」又是「非」ê，因爲上帝是信實 ê，凡 nà 領受道 kap 應允 ê 信徒攏有四重保障：tī 基督內伊 ê 繼續不斷佇堅固咱；落來三個保障是一 pái 永遠成就 ê，伊已經抹油 tī 咱，印上印記，表示無反悔。又賞賜聖神 hō 咱作抵押，tùi-án-ni 咱受洗歸 tī 伊，一生要受聖神 ê 保護 kap 帶領。保羅 tī chit 段經文將教會是上帝 ê 「印記」、上帝 ê 道 kap 傳教者、信徒作緊密 ê 結連。印記是一種榮耀，是拯救 ê 記號。今 á 日 ê 教會 tiòh ài 注意咱所講所行，lóng 是代表著教會 kap 耶穌基督之間 bē-tàng 分割 ê 關係。全款信徒既然是代表著聖神 tī 伊身上有所作 ê 印記，就 ài 謹慎。信仰需要行動，要 kap 咱所傳 ê 道合一，咱要道成肉身，hō 人看見、hō 人感受，進一步 koh hō 人求問、明白 kap 接受。咱也 tiòh 立志 tùi 道來認識家己 kap 咱所處 ê 世界，用道來規範家己，以及 kap 世界 ê 關係。總是咱要怎樣在上帝 ê 道內成長、定根，結出聖神 ê 果子 neh?就是讀經，hō 家己浸 tī 道 ê 世界內底，掠著聖經 ê 信息 kap 祈禱來領受聖神 ê 能力，潘霍華講：「讀經就是 beh 靜心聽伊講 ê 是甚麼。」只有咱用心去體會上帝的心意，chiah ē-tàng 深化咱 ê 信仰、活出見證，用聖經來得著人。頂禮拜日我到台北東門教會禮拜，in tú-teh 推行讀經運動，三年讀完整本聖經，目前已進入第三回，kui-ê 教會非常有活力。希望兄弟 tùi 今 á 日起配合週報 ê 每日讀經，有計畫 ê 靈修，nà 有意 beh 參加新眼光讀經運動 ê，請向我登記，我會設法提供資料，hō 咱教會成做有根有基 ê 教會。